

14.08.2025

UKA2025/135

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunaanni nunaqarfinni tamani ingerlatsinissamut akuersissuteqarfiullutik qulimiguulinnut mittarfinnik pilersitsinissamut, pioreersunillu aserfallatsaaliuinissamut, kingusinnerpaamik UKA2026-mut, Naalakkersuisut sanaartornissamut pilersaarusiornissaannut (projektering) peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens NapâtôK', Naleraq)

Tunngavilersuut:

Nunatsinni sumiiffigisap mittarfiani timmisartussap kinguaattoornerata naammagittaalliutigisarnera nalinginnaasuvoq. Qanorli ajornerutigissava sumilluunniit nalinginnaasunnguamik mittarfeqanngivikkaanni.

Sumiiffiit ilaanni attaveqaasersuutit pingaaruteqavissortut pilersinngiinnarlugit sipaarutigiinnarsimavagut.

Kangerluk, Nutaarmiut, Qeqertarsuatsiaat, Nuugaatsiaq, Kangaamiut, Naajaat, Qeqertat, Atammik, Kapisillit, Oqaatsut, Saarloq , Igaliku , Napasoq, Qassiarsuk, naggataatigullu Illorsuit.¹

Qulimiguulinnut mittarfinnguamilluunniit atortorissaarutikinnerpaasumik "helistop"-iinnarmilluunniit sumiiffiit taasakka peqartinngilagut, naak sumiiffiit taakkua ilai untritillit arlalinnik inullit. Inoqarfinnilu arlalinni qulimiguulinnut mittarfiit aserfallatsaaliuinissamut nutarsagassanngoqqapput.

Assersuutitut Kangaamiut, Atammik, Napasorlu qulimiguulinnut mittarfinnut sanaartorfiginissaat naatsorsorneqarnikuuvoq 3-6 mio. kr., sineriammilu pioreersuni tamani aserfallatsaaliuinissaq 11 mio. kr.-imut ilaatigut naatsorsorneqarnikuulluni². Sanaartugassanut allanut sanilliullugit taamak attaveqaasersuutit pingaaruteqartigisunut aningaasartuutit annertunerpaanngillat. Taamaammat ullutsinnut naleqqussakkamik sanaartortitsinissaq nutarsaanissarlu siunertaralugu pilersaarusiortitsinissaq ataatsimoorfigitigu.

¹ § 37 apeqqummut akissut nr. 2024-182

² § 37 apeqqummut akissut nr. 2024-182



Aalajangiiffissatut siunnersuut akuerineqarpat, Naalakkersuisut peqquneqassapput ingerlatsinissamut akuersissuteqarfiullutik qulimiguulinnut mittarfinnik nutaanik sanaartornissamut pioreersunillu nutarsaanissamut ullutsinnut naatsorsukkanik pilersaarusiortitseqqullugit.

Uagut Naleqqamit Nunatsinni inoqarfinni sumiluunniit minnerpaamik pingaaruteqavissortunik attaveqaasersuuteqarnissaq qulakkeerniartuassavarput. Inerisaaneq pingaaruteqaqisoq siammartertigu.

Qujanaq.

Pisortanut aningaasatigut allaffissornikkullu kingunerisassat

Pisortanut aningaasatigut kingunerisassat ukiut 2 AC-fulmægtigt suliaanik kinguneqarnissaa naatsorsuutigineqarpoq.

Namminersorluni inuussutissarsiuteqarnermut aningaasatigut allaffissornikkullu kingunerisassat

Soqanngilaq.

Innuttaasunut aningaasatigut allaffissornikkullu kingunerisassat

Soqanngilaq.